



Headlines

- प्रधानमंत्री नरेंद्र मोदी होरें आखेआ ऐ जे अज्ज समूलची दुनिया भारत आहली बक्खी मतियें आसें-मेदें कन्नै दिक्खा'रदी ऐ।
- प्रधानमंत्री नरेंद्र मोदी होरें मोटापा रोधी अभियान लेई नामित हस्तिएं च उमर अब्दुल्ला होरें'गी बी शामिल कीता, मुख्मन्त्री होरें एह जिम्मेदारी थहोने पर खुशी प्रगट कीती।
- जम्मू-कश्मीर विधानसभा दी स्पीकर होरें औंदे बजट इजलास लेई सुरक्षा ते होरनें तैयारिएं दी समीक्षा कीती।
- गृह मंत्री अमित शाह होरें वतन को जानो सैर पर गेदे जम्मू-कश्मीर दे नौजवानें कन्नै गल्लबात कीती ते आखेआ जे एह आयोजनद केंद्र शासित प्रदेशें दे नौजवानें गी मुलखै गी कोलै थमां दिक्खने दा मौका दिंदा ऐ।
- मौसम विभाग नै कल्लै कोला लेइयै 28 फरवरी तगर हल्के कोला दरम्याने दर्जे दी बरखा दी पेशगोई कीती ऐ।



PM-GIS

प्रधानमंत्री नरेंद्र मोदी होरें अज्ज आखेआ ऐ जे भारत दे इतिहास च एह पैहली बारी ऐ जे समूलची दुनिया स्हाड़े आहली बक्खी नमिएं ते बड्डिएं आसें-मेदें कन्नै दिक्खा करदी ऐ। अज्ज भोपाल च दुनिया भरै दे निवेशकें दे शिखर सम्मेलन दा उद्घाटन करदे होई मोदी होरें आखेआ।

उनें गलाया जे आम आदमी, अर्थ शास्त्रिएं, संस्थानें ते दुनिया दे केई देशें गी भारत कोला बेशुमार मेदां ना। उनें आखेआ जे विश्व बैंक कोला लेइए दुनिया दे बड्डे संस्थान बी भारत गी दुनिया दी सब्भनें शा तेजिया कन्नै बरोस करा करदी अर्थ बवस्था दे रूपै च दिक्खियै संदोख बुज्जदे ना। दुनिया दे बड्डे-बड्डे निवेशकें इत्थे रास पूंजी लाने लेई आवै करदे ना। मोदी होरें आखेआ जे स्हाड़े मुलखै पर दुनिया दे बधदे भरोसे कन्नै सब्भनें राज्यें दा आत्मविश्वास बी बधेया ऐ ते जित्थे-जित्थे डबल इंजन दी सरकार ऐ उत्थे विकास दी रफ्तार च बी तेजी आई ऐ।



CM-Obesity Awareness

अपने कल्लै आहले मन की बात कार्यक्रम च कीते गेदे जिक्र दे मूजब, प्रधानमंत्री नरेन्द्र मोदी होरें मोटापे खलाफ लड़ाई ते तेल दी खपत घटाने बारै जागरूकता बधाने लेई जम्मू-कश्मीर दे मुख्मन्त्री ओमर अब्दुल्ला ते होरनें किश हस्तिएं गी नामजद कीता ऐ। मुख्मन्त्री उमर अब्दुल्ला होरें इस नामजदगी लेई खुशी जाहिर करदे होई

प्रधानमंत्री मोदी हुंदा धन्नवाद कीता। इक सोशल मीडिया पोस्ट च मुखमंत्री होरें मोटापे करी होने आहले सेहत सरबंधी खतरें जि'आं दिलै दिएं बमारिएं, शूगर ते मानसिक सेहत सरबंधी मुद्दें पर लोऽ पांदे होई इस अभियान च अपने सैह्योग गी पक्का कीता ऐ। उ'नें जेहडे 10 लोकें गी नामजद कीता ऐ उ'ंदे च पैरा तीरंदाज़ शीतल देवी, क्रिकेटर इकरा रसूल, वुशु लेई भारत दे राश्ट्री कोच कुलदीप हांडु, जम्मू-कश्मीर थमां अंतर्राश्ट्री रिदमिक जिमनास्ट पलक कौर, दीपिका पादुकोण ते इरफान पठान होर शामिल ना। इ'नें सब्भनें गी एह गुजारिश बी कीती गेई ऐ जे ओहू बी अगगे 10-10 होर लोकें गी इस अभियान लेई नामजद करना।

<><><><><><>

### Speaker-Security Review

जम्मू-कश्मीर विधानसभा दे स्पीकर अब्दुल रहीम राथर होरें औंदे बजट इजलास गितै सुरक्षा तैयारिएं ते होरनें बंदोबस्तें दी समीक्षा गितै इक बैठक सद्दी ते सरबंधित बक्ख-बक्ख मैहकमें दे अधिकारिएं गी निर्देश दित्ता जे आपूं च नेडमा तालमेल बनाइयै कम्म करन तां जे इजलास गी पूरी चाल्ली रमानदारी ते बवस्था आहले ढंगै सिर तोड़ चाढेआ जाई सकै।

<><><><><><>

### Speaker All Party Meet

औंदी 3 मार्च थमां शुरु होने आहले जम्मू-कश्मीर विधानसभा दे बजट इजलास कोला पैहले स्पीकर अब्दुल रहीम राथर होरें औंदी 27 फरवरी गी सब्भनें पार्टिएं दी इक बैठक सद्दी ऐ तांजे सदन दे कम्मैकाजै गी बवस्थित ढंगै सिर तोड़ चाढना जकीनी बनाया जाई सकै। इस बैठका च नेशनल कांफ्रेंस, बीजेपी, पीडीपी ते पीपुल्स कांफ्रेंस दे नेता हिस्सा लैडना। 43एं दिनें दा एहू बजट इजलास हंगामेदार रेहूी सकदा ऐ कीजे बरोधी धडे नै केई सारे मामलें गी लेइयै सरकार गी घेरने दी तैयारी कीती दी ऐ। जित्थे इक बक्खी मुख बरोधी दल बीजेपी आसेआ सत्ताधारी पार्टी नेशनल कांफ्रेंस गी ओहदे चुनावी घोषणा पत्तर च कीते गेदे वादें ते शासन सरबंधी मामलें गी लेइयै घेरने दी तैयार कीती गेदी ऐ उत्थे गै पीडीपी ते पीपुल्स डेमोक्रेटिक पार्टी इक बारी फ्ही दफा 370 दा मुद्दा पुट्टने सने शराब दी बिक्री ते खपत पर पाबंदी ते होरनें मामलें गी बी पुट्टी सकदी ऐ।

<><><><><><>

### Announcement

आकाशवाणी जम्मू दे क्षेत्रीय समाचार एकांश आसेआ कठुआ जिले लेई अंशकालिक संवाददाता यानि पीटीसी लेई दरखास्तां मंगियां गेइयां ना। इच्छुक आवेदक जेहदी उमर 24 थमां 50 ब'रें दे बश्कार ऐ ते ओहू कठुआ जिले दा रौहने आहला ऐ, इस लेई आवेदन करी सकदा ऐ। मेदवार कश पत्रकारिता च पी.जी डिप्लोमा, डिग्री या कुसै बी पंजीकृत यूनिवर्सिटी थवां ग्रैजुएशन ते पत्रकारिता च 2 ब'रें दा तजुर्बा होना लोडचदा ऐ। मेदवार गी कम्प्यूटर पर खबर बनाने ते मीडिया कवरेज दे अनुभव सने सरबंधत लोडचदे उपकरणें वगैरा दा इस्तेमाल करना बी औना चाईदा। आवेदक जिला सदर दफतर दी 10 किलोमीटर दी हद्द दे अंदर-अंदर रौहदा होना चाईदा ऐ। दरखास्त ते लोडचदे दस्तावेजें दी कॉपी मेदवार गी क्षेत्रीय समाचार एकांश आकाशवाणी पंजतीर्थी पिन कोड 180001

उप्पर उप्पर 07 मार्च 2025 थवां पैहले-पैहले आइए दस्ती जमा करोआनी होग। इस बारै व्यापक जानकारी आकाशवाणी दी वेबसाइट [www.newsonair.gov.in](http://www.newsonair.gov.in) पर उपलब्ध ऐ।

<><><><><><>

### HM Watan ko Jaano

गृहमंत्री अमित शाह होर अज्ज नमीं दिल्ली च जम्मू कश्मीर दे युवाएं कन्नै गल्लबात कीती। युवाएं गी संबोधित करदे होई गृह मंत्री होरें आखेआ कि वतन को जानो सैर जम्मू कश्मीर दे नौजवानें गी अपने मुल्खै दे बक्ख-बक्ख हिस्सें च जाने ते जानने दा मौका दिंदी ऐ जेदे नै उन्दे अंदर देसै प्रति मान ते अपनेपन दी भावना पैदा होंदीं ऐ। युवा संपर्क तैहत “वतन को जानो” कार्यक्रम दे चलदे इनें युवाएं गृहमंत्री हुंदे कन्नै मलाटी कीती। जम्मू कश्मीर बक्ख-बक्ख स्कूल दे आर्थिक तौर पर कमजोर 250 बच्चें गी प्रदेश दिएं शिक्षा मंत्री सकीना इत्तू होरें रवाना करोआया हा। एहू दल 13एं दिनें दे दौरै पर ऐ। समाज कल्याण मैहकमे ते गृह मामले सरबंधी मंत्रालय दे सैह्योग कन्नै इस दौरै दा सरिस्ता कीता ऐ। एहदा मकसद युवाएं गी भारत दी समृद्ध सांस्कृतिक विरासत बारे जानकार बनाना ते राष्ट्रीय एकता दी भावना गी बल देना ऐ।

<><><><><><>

### IGP Security Review

जम्मू जोन दे पुलस महानिरीक्षक भीम सेन टूटी होरें अखनूर दा दौरा लाइयै सुरक्षा स्थिति दा जायजा लैता ते अधिकारिणें गी निर्देश जारी कीता जे ओहू बन्ने पारा चुनौतिणें गी लेइयै पूरी चाल्ली सौहगे ते सतर्क रौहना आई.जी.पी हुंदे इस दौरै पर जम्मू-साम्बा-कठुआ रेंज दे डी.आई.जी शिव कुमार शर्मा ते एस.पी जम्मू ग्रामीण वृजेश शर्मा बी उन्दे कन्नै हे। उनें सुरक्षा उपाएं दी समीक्षा कीती ते फौज दी 10मीं डिविजन दे जीओसी हुंदे कन्नै सामरिक योजना दे बारै च बी चर्चा कीती। इनें अफसरें अंतरराष्ट्रीय बन्ने ते नियंत्रण रेखा कन्नै लगदे इलाकें दी सुरक्षा बवस्था दा बी निरीक्षण कीता। आई.जी.पी होरें गी इलाके च अपराधें दी स्थिति, अपराधें ते अपराधिणें दा पता लाने सरबंधी सी.सी.टी.एन.एस नेटवर्क सरिस्ते बारै बी तफसीली जानकारी दिती गेई। उनें पुलस अधिकारिणें, ग्राम रक्षा समूहें, तुरत कार्रवाई टीमें ते सीमा पुलस चौकिणें गी बी फौज कन्नै नेडमा तालमेल बनाइयै कम्म करने दा निर्देश दिता।

<><><><><><>

### Accident Ramban

पहाड़ी जिला रामबन च होए दे इक शिडक हादसे च 41 महिला दी मौत होई गेई जिस्सलै के 12 होर जनें जख्मीं होई गेन। एहू हादसा उस्सलै पेश आया जिस्सलै सवारियें आहली इक गड्डी शिडकै थमां रूलकी गेई। एहू गड्डी दूर-दरेडे ग्रांस छब्बा थमां रामबन आहली बक्खी आवा'रदी ही। जिस महिला दी मौके पर मौत होई, ओहदी पंछान 33एं बरें दी संकेशा देवी दे तौर पर होई ऐ जिस्सलै के जख्मियें च 4 महिलाएं सने 12 लोकें गी उपजिला अस्पताल पजाया गेआ। इन्दे चा 2 जनें दी हालत गंभीर दस्सी जा'रदी ऐ। इस बारै होर मती जानकारी देआ'रदे न स्हाडे जिला संवाददाता अजयदीप सिंह।

<><><><><><>

## Divya Kala Mela

जम्मू दे गुलशन ग्राउंड च आयोजित दिव्य कला मेला 2025 अज्ज 10एं दिनें दे शानदार जतन दे मगरा संपन्न होआ करदा ऐ। एह मेला जंदी 14 फरवरी गी शुरु होआ हा ते इन्नै 20 शा मते राज्यें थमां आए दे 100 शा बद्ध दिव्यांग कारीगरें गी दस्तकारी, कपड़े-टल्लें, गैहनें-बंदें ते पर्यावरण दे अनुकूल उत्पादें गी प्रदर्शित करने लेई इक सांझा मंच उपलब्ध करोआया। इस दरान लोकें गी उत्थे सांस्कृतिक पेशकारियें दा नंद लैने सने, मुकामी व्यांजनें दा सोआद चक्खने दा मौका बी मिलेआ। इस सरबंधै च अपने तजुबे सांझे करदे होई मुकामी कारीगर नै आखेआ।

<><><><><><>

## Watershed Yeatra Reasi

पानी दे टिकाउ प्रबंधन दी दिशा च इक महत्वै आहली गैंह पुट्टेदे होई संगठित वाटरशैड प्रबंधन प्रोग्राम आसेआ रियासी दिएं डिप्टी कमिशनर निधि मलिक हुंदे मार्गदर्शन तैहत जिले दे सरकारी हायर सकेंडरी स्कूल टोटे च वाटरशैड जात्तरा अभियान 2025 दा सरिस्ता कीता गेआ। इस पैहलकदमी दा मकसद पानी दी सांभ-संभाल गी बढावा देना, सिंचाई सरबंधी सरिस्तें च बाद्दा करना ते प्रधानमंत्री कृषि सिंचाई योजना दे दुए चरण दी अमल-आवरी जकीनी बनाना ऐ। इस मौके उप्पर जागरूकता कार्यक्रमें सने, रूक्ख-बूहटे लाने सरबंधी अभियान ते गल्लबात आहले गेइ बी लोआए गे।

<><><><><><>

## Weather

मौसम विभाग नै कल थमां लेइयै 28 फरवरी बश्कार हल्की थमां दरम्याने दर्जे दी बरखाते बर्फबारी दी संभावना जताई ऐ। विभाग नै परामर्श जारी कीता ऐ जे इस दरान यातायात पर असर पेई सकदा ऐ खास करी साधना पास, राजदान पास, सोनामर्ग-जोजिला-गुमरी, मुगल रोड ते सिंथन पास बगैरा आली शिड़कां शामिल ना सैलानिएं, यात्रिएं ते ट्रांसपोटरें गी अपनी योजना मौसम दे साब्बै बनाने दी सलाह दिती ऐ।

<><><><><><>